

# PERHIMPUNAN SISWA MERDEKA 2008 ANJURAN KEKKWA, MAKUM DAN UTM

**- TANAM SIFAT SAYANGKAN TANAH AIR DI KALANGAN PELAJAR IPT MALAYSIA**

13 Januari 2008 – Setelah berkampung selama 4 hari di Universiti Teknologi Malaysia (UTM), Skudai, Johor, seramai 32 Mahasiswa/i UniMAP bersama-sama mahasiswa/i dari 34 Institusi Pengajian Tinggi seluruh Malaysia telah berhimpun di UTM untuk menjayakan Perhimpunan Siswa Merdeka 2008 yang merupakan acara tahunan Kementerian Kebudayaan, Kesenian dan Warisan Negara ( KeKKWa ) dengan kerjasama Majlis Kebudayaan Universiti-Universiti Malaysia (MAKUM).

Acara ini menghimpunkan lebih kurang 2,000 mahasiswa/i seluruh Malaysia dan persembahan citrawarna ini dikelolakan oleh Jurutari dan Koreografer yang berpengalaman dari Istana Budaya. Antara persembahan menarik sempena Perhimpunan Siswa Merdeka pada kali ini adalah pementasan dramatari yang menceritakan rentetan sejarah Malaysia bermula dari zaman penjajah hinggalah mencapai tahap Malaysia Gemilang pada masa sekarang.

Acara yang terdapat di Perhimpunan Siswa Merdeka turut menggabungkan beberapa elemen kesenian antaranya bacaan puisi, lakonan, tarian dan nyanyian yang berunsurkan semangat patriotisme dan jatidiri.

Majlis perasmian pembukaan program ini dirasmikan oleh Timbalan Ketua Setiausaha KeKKWa, Datuk Nor Azmal bin Mohd Nazir. Pengerusi MAKUM, Prof. Ir. Dr. Amir Hashim Mohd Kassim dan Timbalan Naib Canselor HEPA UTM, Dato' Prof. Ir. Alias bin Mohd Noor juga turut hadir menyaksikan program ini.

Salah satu objektif utama penganjuran program ini adalah untuk menanamkan semangat patriotisme di kalangan pelajar IPT melalui penghargaan kepada nilai-nilai kebudayaan dan kesenian negara.